

Mientras cu tin bon pelicula pa estrena durante e festival e aña aki

Hopi incertidumbre ta stroba e di 4 Festival Internacional di Cine di Aruba di luci

ORANJESTAD – Menasa di un protesta di comerciante cu ainda tin cu haya nan placa di e festival di aña pasa, y un sponsor grandi cu no tey mas, ta un di e poco factornan cu a pone un nubia scur riba e di 4 festival internacional di cine di Aruba. Bon pelicula pa wak, pero un interes menos cu normal, y un confusion di kico e situacion exacto financiero ta di AIFF y mas importante, su creador y productor ehecutivo, Jonathan Vieira.

SOSTEN DI ATA

E solo hecho cu e aña aki Aruba International Film Festival no tin sosten di Aruba Tourism Authority, ta pone cu AIFF tin su retonan financiero cune. Sigur si tene na cuenta cu e aporte comercial fuera di e publicidad rond di e evento, tabata por lo menos 500.000 dollar pa e festival. Un suma y publicidad cu e aña aki AIFF no tin. E organizador y e creador di e evento, Jonathan Vieira ta



bon conciente di dje. “Obviamente esaki ta crea su retonan cune” Vieira ta confirma na BON DIA ARUBA ayera riba e premiere di e festival su edicion number 4.

Ora cu bo tin sosten di ATA, financieramente e ta yuda pasobra bo por facilita cosnan por medio di placa, segun Vieira. Di otro banda e ta muestra di ta contento cu pa e ultimo 3 aña ATA a haci un

bon trabou cu a crea credito pa e evento. Na prome instante y ainda, Vieira ta admiti di ta andando pa un solucion cu e creditornan di aña pasa. “Pero mi tin rond di mi cu kier pa e festival pasa” Vieira ta sigui bisa. E presion ey ta pone cu e mester a hacie, sino e hendenan cu ta yude, lo a lague cai.

AYUDO

Poco poco Vieira ta hayando

ayudo pa e creditornan. “Mi ta lamenta si cu bo ta haya algun creditor ta di mala fe. Esei ta mi opinion personal. Nan kier e proyecto stop. E ta un beneficio pa nan” Vieira ta bisa.

BANCAROTA

Manera ta conoci, algun luna pasa oficialmente Corte a declara Jonathan Vieira bancarota debi cu e no por a cumpli cu e creditornan cu e la keda debe di e festival di e aña anterior. Esey a pone cu e la haya un setback basta formal, cu a pone te hasta e festival su existencia den duda. Un di e resultadonan mas fastioso pe, tabata e revocacion di e patrocinio di ATA Aruba, cu a opta e aña aki cu nan no ta sostiene e festival manera cu nan a bin ta haci pa e ultimo 3 añanan.

PRIMICIA

Mes momento Vieira a sigui haci tur empenjo pa toch trece e festival riba pia. Y poco poco e la logra haya cierto ayudo cu a pone cu algun si-

man pasa manera cu BON DIA ARUBA a anuncia den forma di primicia, AIFF a anuncia su fechanan pa e festival e anja aki. Mas chikito, y cu menos number grandi y sin un concierto.

Pero e festival tabata anuncia. Otro problema cu Vieira a encontra, ta e tempo cu no tabata su miho amigo. Apenas algun siman prome cu e festival, e fechanan a wordo anuncia, cu a pone cu publicidad pa e festival no tabata manera e mester ta.

CONCIERTO

Si aña pasa a anuncia e festival den un forma grandioso, cu un concierto mara na dje, e aña aki algun conferencia a wordo teni, cu no a hala e atencion debido localmente. Peliculanan sinembargo cu ta wordo presenta, ta di calidad hopi halto. Y esaki ta di lamenta pasobra bon pelicula ta wordo desprecia pa falta di atencion di publico, debi na, falta di propaganda. □